

## Bebera·ani aro Gisik pil·ani

By Mr. Digreat D. Marak Asst. Pamong (NBC)

### Aganchengani:

Ia somoirango kristian beberagiparagoniba dingtangroroangenganiko nikna manenga. Uni gimin manderang bebera·aniko aro gisik pilaniko altue kusikchi agana sa bangbatengjok. Bebera·anian mongsonggipa bak ong·a kristianrangni toromni gita bebera·anio aro bewal cholono maina an·ching bebera·achi jokatako man·aha, Eph. 2:8. Jedake kristo manderangko ansengataha (healed) uamangni bebera·ani bewalko nika nigiminsa. Mark 10:5, Mikgri bebera·ahani gimin nikna man·aha. Bebera·achi an·ching Jisu kristo angni jokatgipa ine rachaka aro kurachaka. An·pilbaniara an·chingni sikbee nama kattani okgamanina aganchakani ong·a. Katta “conversion-ni” miksongani an·pile re·bani- uan gisikni gita an·pilbani paponi kristoona. Paponi an·pilbanikon gisik pil·ani ine agana (repentance) aro kristoona an·pile re·banikon bebera·ani (faith) ine agana.

**Bebera·ani mai? (What is faith?)** Bebera·ani Greek kattao “*pith*” jean “*pistis*” ingipaoni ong·a (faith). Bebera·aniara namen gisik pil·ani baksa nangrima. Bebera·aniara ramram bebera·anina bata. Chongmotgipa bebera·ani (genuine faith) Isolni ka·sae on·ani ong·a aro ua Mandeni bonkamgipa katongoni re·ba. Uni gimin bebera·ani ramram bebera·anina bate bilakbata maina uan Isolni ka·sae on·gipa ong·a.

Ibr. 11:1, Bebera·a kadongarangni pangchaka nikkijarangko uiani ong·a. Gisik pil·ani jamano bebera·aniona re·ba indake bebera·anisa bite nangata. Sastro Ibr. 11: 6, Indiba bebera·a gri Isolko kusi am·ja, maina Isolona re·bagipa ua gnang ine, aro uko am·giparangna man·gniko on·gipa ong·a ine bebera·na nanga. Bebera·a jean jokata an·tang Gitel Jisu kristoo bebera·na nanga.

**Bebera·ani namgni ba bite:** An·ching bebera·achi jokatako man·aha. Abachenga 15:6, aro Rom. 4:3 Aro Abraham Isolo bebera·aha, aro uko toromi ine chanaha. Johan 1:12, Indiba badita mande uko ra·chakaha, ua uamangna chongmotan uni bimungo beberagiparangna, Isolni de ongchina bil on·aha.

An·ching bebera·achi kakatgipa ba bebegipa ine chanako man·aha. Rom. 5:1 “Uni gimin bebera·achi toromi ine chanako man·a.”

An·ching bebera·achi Isolni dedrang ong·aha. Gal. 3:26, “Maina kristo Jisuko bebera·achi pilakan Isolni depanterang ong·aha.”

An·ching bebera·achi rongtala ine chanako man·aha. Watatarangna 26:18, Beberagiparang bebera·achi rongtala ine chanako man·aha.

**Gisik Pil·ani (Repentance).** Niam giticham (Old Testament) somoio niamni kamo manderang boli on·a aro uamang an·tangtangni paponi kurachaka, boli on·a uandaken pap kataiaona sokbapila. Nama kattao gisik pil·anide paponi an·pile aro Isolona an·pilani ong·a. Watatarangna 20:21, Sakki on·a Jihudirangna ba aro Greekrangna, Isolchina gisik pil·china agananiko nikna man·a ukon janggiona gisik pil·a ine aganaba an·pilba. Uan namgijako wate re·anga, indiba janggiko man·a kristoo. Maina watatarangna 11:18, Aro uamang ia kattarangko knao jrip dongaha, indide Isol gipin jatrangnaba janggina gisik pil·aniko on·aha ine, Isolko rasong chaataha.

**Gisik pil·aniko talatani:** Gisik pil·aniara paptangna duk ongmangmangaini ong·ja, paptangna grapaiani ong·ja Gisik pil·ani gri, bakan apsan pap dakaniona re·bapilaia. Gisik pil·aniara gisik dingtang ong·ani jean dingtang cholon bewalona dingtanga.

Mati 21:28-32, Skanggipa depante jechakaha draka bario kam ka·na indiba jamano gisik pil·e re·angaha. Gisik pil·ani (repentance) gisik papna duk man·e, uko watgalna nanga, aro chongmot on·kangna aro kristoo

bamao rerurana nang·a. Mark 1:15, Sal chusokaha, aro Isolni songnok sepangaha, nasimang gisik pil·bo , aro nama kattako beberabo.

***Gisik pil·na nangchongmotani:*** Gisik pil·aniara namen nanchongmotgipa ong·a Johan Baptist ka·atgipani ministryo gisik pil·china agananiara mongsonggipa theme ong·a. Mati 3:1,2, Uororo Johan Baptist ka·atgipa re·bae Judeani bakrao aganprake inaha, gisik pil·bo. Jensalo Jisu uni sninggiparangko watata uamang gisik pil·china aganpraka. Mark 6:12, Aro uamang re·ongkate gisik pil·china aganpraka. Jisuni sninggiparang gisik rongtalgipako man·ani jamano gisik pil·china aganpraka. Watatarangna 2:38 Unon Pitor uamangna, aganaha nasimangni paprangko watchina nasimang sakantian gisik pil·bo.

### **Bon·kame aganani:**

Anga iano jerangko seaha aganaha ian kandikgipa ong·ani gimin chu·ongbeaha inede ong·ja. Indiba pangchakani aro ramako mesokasan uon baksana gisiko naatnasan ong·aia.

Bebera·ani aro Gisik pil·aniara namen nangrimgipa ripeng gita ong·a maina gisik pil·ani gri mande apsan pap dakaniona re·bapilna manaia. Uni gimin gisik pil·anide pap tangna duk mangmang ong·aiani ong·ja indiba papko watgal·e kristoona re·banisa ong·a. Bebera·a ine aganoba gisik pil·ani gri de mamung nama biteko nangna am·ja batesa apsan pap dakaniona sokangna altubea. Jisu uni ministry·ko abachengon manderangko gisik pil·na agana aro apsan daken Johan napolat gipa uni ministry ode gisik pil·china didianian mongsonggipa theme ong·a.